



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 412
fax. +387 33 726 414
e – mail: info@voda.ba

Broj: **UP-1/21-2-40-008-3/23**

Datum: **24.01.2023. god.**

«Agencija za vodno područje rijeke Save» Sarajevo rješavajući po zahtjevu Općine Bosanska Krupa podnesenom za izdavanje vodne saglasnosti na projektnu dokumentaciju za izgradnju fekalne kanalizacije u Bosanskoj Otoci na dijelu rukavca rijeke Une na području Općine Bosanska Krupa u naselju Bosanska Otoka, na osnovu člana 114. a u vezi sa članom 109. stav (1) tačka 2. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 49/99 i 61/22), **donosi**

RJEŠENJE **o vodnoj saglasnosti**

1. Investitoru, „Gradu Bosanska Krupa“, daje se vodna saglasnost na projektnu dokumentaciju pod nazivom: „Glavni projekat – Fekalna kanalizacija u Bosanskoj Otoci na dijelu rukavca rijeke Une“ u svrhu prikupljanja fekalnih i otpadnih sanitarnih voda u dijelu naselja Bosanska Otoka, prečišćavanje otpadnih voda i nakon tretmana ispuštanje u recipijent, rijeku Unu, projekat urađen i revidiran od strane ovlaštenih pravnih lica „IBIS“ doo Zavidovići, juna 2021.godine, revidovan od strane „HKP Consulting“ doo Banja Luka, 26.08.2021. godine.
2. Vodna saglasnost se donosi na osnovu utvrđenog činjeničnog stanja, pregleda projektne dokumentacije iz tačke 1. dispozitiva ovog Rješenja, koja se ovjerena vraća podnosiocu zahtjeva na trajno čuvanje i čini sastavni dio ovog Rješenja, a ista će se koristiti u postupku pribavljanja odobrenja za građenje.
3. Dostavljeni Glavni projekat je urađen u skladu sa osnovnim uslovima iz Rješenja za prethodnu vodnu saglasnost broj: UP-1/21-1-40-280-6/22 od 11.10.2022. godine. Vodna saglasnost se donosi na temelju dostavljene projektne dokumentacije pod sljedećim uslovima:
 - 3.1. Izvođenje radova vršiti u skladu sa ovjerenom projektnom dokumentacijom iz tačke 1. ovog Rješenja, tj. na način utvrđen u opisu tehničkog rješenja i tehničkih uslova izvođenja iz navedene projektne dokumentacije.
 - 3.2. Nosioc prava iz vodne saglasnosti dužan je u saradnji sa izvođačem radova i nadzornim organom prije početka radova riješiti sve eventualne nepoznanice na trasi budućeg kolektora koji prolazi kroz vodno dobro rijeke Une, bilo da je u privatnom ili je data na upravljanje AVP Sava.
 - 3.3. Korisnik je dužan da uredno vodi dnevnik rada sa tačno definisanim lokalitetima iskopa, dubini iskopa, ispitivanje vodonepropusnosti cjevovoda kolektora i revizionih okana, i svim ostalim podacima koji se uobičajeno vode kod ovakve vrste radova.
 - 3.4. Prilikom izvođenja radova treba koristiti opremu i mašine koje su tehnički ispravne, bez curenja tečnih goriva, maziva, hidrauličkih ulja i sl.
 - 3.5. Investitor (korisnik vodne saglasnosti) je u obavezi da angažuje stručno lice sa osnovnim zadatkom kontinuiranog nadzora (praćenja i kontrole) nad provođenjem projektovanih aktivnosti na terenu.
 - 3.6. Predvidjeti da se sav nastali otpad prikuplja i zbrinjava izvan površina obuhvaćenih uticajem velikih voda, a u skladu sa važećim propisima o postupanju sa otpadom.

- 3.7. Nakon završetka radova neophodno je radni pojas koji uključuje pojas uz korito, inundacioni pojas i obale rukavca urediti i očistiti od gradilišnih zahvata, mehanizacije i gradilišnog otpada.
- 3.8. Planom organizacije gradilišta koje će se formirati u funkciji provođenja navedenih radova, treba osigurati da mjesta za smještaj građevinske mehanizacije, tečnih goriva i maziva budu locirana izvan nivoa velikih voda i na takvoj udaljenosti da ne mogu imati negativan uticaj na vodotok.
- 3.9. U toku izvođenja radova, neophodno je poduzeti sve potrebne mjere zaštite, da predmetnim aktivnostima ne dođe do nastanka štete ili nepovoljnih posljedica po vode i vodni režim (erozija obala i korita vodotoka, pogoršanje kvaliteta vode i dr).
- 3.10. Sve kolizije sa postojećim infrastrukturnim objektima (instalacijama vodovoda i kanalizacije, elektro i sl.), na lokalitetu na kojem će se vršiti radovi obuhvaćeni izgradnjom fekalne kanalizacije na dijelu rukavca rijeke Une, ukoliko do takvih situacija tokom izvođenja radova dođe, prethodno će se rješavati uz saglasnost mjesno nadležnog operatera koji upravlja tim objektima i instalacijama i isti će dati tehničke uslove za izvođenje ovih radova.
4. Ukoliko se izvođenjem radova na izgradnji fekalne kanalizacije na dijelu rukavca rijeke Une na predmetnom potezu ili drugim aktivnostima vezanim za predmetne radove prouzrokuju štete i naruši stabilnost korita, postojećih objekata i obala vodotoka ili nanese šteta trećim licima, podnosilac zahtjeva je obavezan uzroke nastanka štetnih promjena otkloniti, a nastale štete nadoknaditi.
5. U slučaju vanrednih situacija, havarijskih onečišćenja i drugih sličnih okolnosti koje bi nastupile u toku izvođenja radova i ugrozile kvalitet voda, obavezno izvijestiti nadležne organe i postupati po nalogu mjerodavnih institucija, te preduzimati hitne mjere i aktivnosti na sprečavanju širenja onečišćenja i na otklanjanju uzroka onečišćenja.
6. Investitor (korisnik vodne saglasnosti) ostaje u obavezi, a kada period izvođenja radova na izgradnji fekalne kanalizacije na dijelu rukavca rijeke Une bude tačno preciziran, najmanje sedam dana ranije obavijesti predstavnike lokalne zajednice o početku izvođenja radova.
7. U periodu važenja ovog rješenja, izvođač radova je dužan provoditi sve mjere i aktivnosti propisane u dispozitivu ovog rješenja kao i uslove propisane od strane drugih nadležnih organa ukoliko isti nisu u suprotnosti sa uslovima iz ovog rješenja.
8. Ukoliko se pojavi višak materijala iz iskopa prilikom izvođenja zemljanih radova, a koji ne bude iskorišten za radove na predmetnoj dionici, potrebno je isti odložiti na deponiju izvan vodnog dobra, a sve u skladu sa uputama Investitora, tj. korisnika ove vodne saglasnosti.
9. Korisnik vodne saglasnosti je u suradnji sa gradom Bosanska Krupa dužan da prije početka izvođenja radova riješi imovinsko pravne odnose na lokalitetu izvođenja radova, na mjestu formiranja privremenih gradilišta, pristupnim putevima i deponijama za odlaganje viška iskopanog materijala.
10. Vodna saglasnost prestaje da važi istekom roka od dvije godine od dana njene pravosnažnosti ukoliko do tog dana nije pribavljeno odobrenje za izvođenje predmetnih radova od strane nadležnog organa i započeti radovi.
11. Ovo rješenje o vodnoj saglasnosti može se izmijeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev za izmjenu ovog vodnog akta.

Obrazloženje

Investitor, Grad Bosanska Krupa, je podnio zahtjev dana 13.01.2023. godine za izdavanje vodne saglasnosti za izgradnju fekalne kanalizacije na dijelu rukavca rijeke Une na lokalitetu Bosanska Otoka, Grad Bosanska Krupa, dužine 1300,00 m, po projektnoj dokumentaciji dostavljenoj uz zahtjev: „Glavni projekat – Fekalna kanalizacija na dijelu rukavca rijeke Une u Bosanskoj Otoci“ u svrhu prikupljanja fekalnih i otpadnih snitarnih voda u dijelu naselja Bosanska Otoka, prečišćavanje otpadnih voda i nakon tretmana ispuštanje u recipijent, rijeku Unu, urađen od strane „IBIS“ doo Zavidovići, broj: 12-IB-G-2/21 od juna 2021.godine, revidovana od strane HKP Consulting doo Banja Luka, broj 559/21 od 26.08.2021. godine.

- Uz zahtjev za izdavanje vodne saglasnosti dostavljena je slijedeća dokumentacija;
- Rješenje kojim se daje Urbanistička saglasnost Službi za komunalne djelatnosti, vode zaštitu okoliša i inspekcijske poslove Grada Bosanska Krupa za izgradnju fekalne kanalizacije na dijelu rukavca rijeke Une u naselju Bosanska Otoka, na parcelama označenim u kopiji katastarskog plana, broj 04-26-25300/2022-2,3,4,5,i6 od 29.04.2022. godine,
 - Statut općine Bosanska Krupa od septembra 2017. godine, ovjeren dana 16.11.2021. godine pod brojem 8351/2021 od strane jedinstvenog organa grada Bosanska Krupa,
 - Uvjerenje o registraciji poreznog obveznika izdato od Porezne uprave Federacije BiH – Kantonalni porezni ured Bihać dana 17.03.2022. godine,

- Kopija izdate prethodne vodne saglasnosti od strane AVP Sava Sarajevo broj: UP-1/21-1-40-280-6/22 od 11.10.2022. godine
- Dokaz o uplaćenju administrativnoj pristojbi – kopija uplatnice,

U provedenom dokaznom postupku koji je prethodio donošenju ovog rješenja utvrđeno je:

- Investitor je za potrebe izrade projektne dokumentacije za uređenje rukavca rijeke Une angažirao ovlašteno pravno lice, „IBIS“ d.o.o. Zavidovići koja je uradila Glavni projekat kako je prethodno navedeno u tački 1. rješenja,
- Ovlaštenja za izradu projektne dokumentacije prema Pravilniku o uvjetima i kriterijima koje mora ispunjavati pravno lice za izradu dokumentacije na osnovu koje se izdaju vodni akti („Službene novine Federacije BiH“, broj 17/08 i 38/12).
- Da je od strane ove Agencije, rješenjem broj UP-1/21-1-40-280-6/22 od 11.10.2022. godine, izdana prethodna voda saglasnost u kojoj su propisani uslovi koje je projektant prilikom izrade projektne dokumentacije uvažio i u istoj priložio opise i nacрте uobičajene za ovaj nivo projektne dokumentacije:
 - o Situativni prikaz projektne rješenja za dionicu planiranih radova izgradnje fekalne kanalizacije na dijelu rukavca rijeke Une u Bosanskoj Otoci, razmjere 1:1000. U projektnoj dokumentaciji je priložen uzdužni profil u razmjeri 1:1000/100 i poprečni profili u razmjeri 1:100/100;
 - o Predviđenim radovima na izgradnji fekalne kanalizacije na dijelu rukavca rijeke Une planirano je prikupljanje fekalnih i otpadnih snitarnih voda u dijelu naselja Bosanska Otoka, prečišćavanje otpadnih voda i nakon tretmana ispuštanje u recipijent rijeku Unu, za 80 domaćinstava i oko 320 stanovnika.

Na temelju utvrđenog činjeničnog stanja i dostavljene dokumentacije, a u cilju smanjenja negativnih uticaja predmetne izgradnje na stanje voda i prava na vode dodijeljena drugim korisnicima, podnosiocu zahtjeva su ovim vodnim aktom, u tački 3. dispozitiva rješenja, shodno odredbama članova 114. i 128. Zakona o vodama („Službene novine Federacije BiH“, broj 70/06) i člana 7. Pravilnika o sadržaju, obliku, uslovima, načinu izdavanja i čuvanja vodnih akata („Službene novine Federacije BiH“, broj 31/15, 55/19, 41/20 i 63/22), propisani uslovi koje je investitor dužan ispuniti u toku predmetne gradnje.

Uzimajući u obzir naprijed navedeno, a shodno odredbama člana 109. stav (1) tačka 2., a u vezi sa članom 114. „Zakona o vodama“ i članom 7., stav Pravilnika o sadržaju, obliku, uvjetima, načinu izdavanja i čuvanja vodnih akata, valjalo rješiti kao u dispozitivu ovog rješenja.

UPUTA O PRAVNOM LIJEKU:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15,0 KM administrativne takse, prema tarifnom broju 3. Tarife Federalnih administrativnih.

Voditelj postupka:

Fuad Mujagić, dipl.inž.

Prilog:

Ovjerena dokumentacija: : „Glavni projekat – Fekalna kanalizacija u Bosanskoj Otoci na dijelu rukavca rijeke Une“, urađen od strane IBIS doo Zavidovići, juna 2021.godine, revidovana od strane HKP Consulting doo Banja Luka, 26.08.2021. godine.

Po ovlaštenju
Rukovodilac sektora za izdavanje
vodnih akata

Haris Ališehović
Haris Ališehović, dipl.inž.grad.

Dostaviti:

- „Općina Bosanska Krupa“, Terzića bb, Bosanska Krupa 77240; (sa prilogom)
- ISV-vodna knjiga – ovdje;
- ① Arhiva – ovdje;
- AVP Sava – Oglasna ploča